



Ministério da Solidariedade Social e Inclusão



*Sumáriu Atividades
Jullu – Dezembro 2023*

Governu Konstitusionál da-9

INTRODUSAUN

Ministério Solidariedade Social e Inclusão (MSSI) implementa Programa Governu Konstitusionál da-9, komesa fulan Jullu 2023. Relatóriu ida ne'e nu'udar akumulasaun atividades xave husi Ministra Verónica das Dores no Vise-Ministra Céu Brites nian komesa husi fulan Jullu to'o Dezembru 2023, ne'ebé apresenta nu'udar istória liuhosi fotografia.

Programa prinsipál ne'ebé Ministra no Vise-Ministra kontinua aseguira nia implementasaun inklui Funsionamentu no Dezenvolvimentu Institusionál; mudansa ba Lei Orgániku foun MSSI nian, orsamentu retifikativu no orsamentu anuál 2024 ne'ebé aprova ona iha Parlamentu Nasionál. Susesu xave ida mak reestruturasaun iha MSSI inklui Institutu Públiku tuteladu sira, bazeia ba diploma no despaixu, ho objetivu haforsa qualidade atendimentu públiku. Prioridade prinsipál seluk hosi Ministra no Vise-Ministra maka vizita ba Sentru Solidariedade Sosiál iha munisípiu 13 hodi hametin koordinasaun no kooperasaun, no garante atendimentu públiku ne'ebé eficiente no qualidade. Iha parte kooperasaun, MSSI renegosia parseria ho MSST-Portugal no asina nota tékniku foun, haforsa serbisu apoiu ba Instituisaun Solidariedade Sosiál (ISS) sira, no kontinua implementa programa Bolsa da Mãe Jersaun Foun hamutuk ho Governu Austrália.

Iha programa Igualdade Jéneru no Inkluzsaun Sosiál, MSSI halo ona pagamentu pensaun sosiál ba ferik ho katuas no ba Ema ho Defisisénsia (EhD). Ba Bolsa da Mãe Kondisionál, MSSI halo reajustamentu ba dadus benefisiáriu ho objetivu atu hadi'ak atendimentu iha futuru. Aleinde ida ne'e, Ministra no Vise-Ministra mós sai oradór iha enkontru nível alto sira inklui enkontru ASEAN iha Filipina, Indonézia no Xina no mós enkontru kooperasaun iha Portugal.

Tuir mai sumáriu atividade sira husi Ministra no Vise-Ministra nian durante fulan neen nia-laran, ne'ebé kompila iha relatóriu ida ne'e.

Tomada de Pose Ministra e Vice-Ministra Solidariedade Social e Inclusão.

Haktuir Dekretu Prezidente da República N.º 59/2023 iha 30 Jullu liuhusi Juridiksaun Konstitusionál artigu 86 alinea (h) no (i), no Artigu 106 Nú. 2, ho nia kompeténsia Prezidente da Republica fó pose no nomeia membru Governu Konstitusionál da-9 nomeadu sira iha loron 1 Jullu 2023, inklui Ministra no Vice-Ministra Solidariedade Sosiál no Inkluzoan (MSSI) ba períodu 2023 - 2028.

Funsionáriu MSSI simu Ministra no Vice-Ministra iha Edifísiu Ministériu.

Iha loron 3 fulan Jullu 2023 Ministra no Vice-Ministra hamutuk ho Gabinete de Apoio, diretamente simu hosi Ministra no Vice-Ministra sesante ho estrutura tomak inklui institutu tuteladu sira iha Salaun MSSI, Caicoli, Díli. Ministra no Vice-Ministra Sesante entrega relatóriu serbisu durante períodu mandatu ba Ministra no Vice-Ministra atuál iha loron ne'e. Gabinete Ministra no Vice-Ministra hahú servisu iha loron 3 fulan Jullu 2023 hodi kontinua programa MSSI nian, ne'ebé fahe ba área boot rua:

1. Funsionamentu no Dezenvolvimentu Institusionál
2. Igualdade Jéneru no Inkluzoan Sosiál.



Ministra Verónica das Dores ho Vice-Ministra Céu Brites simu husi Ministra no Vice-Ministra sesante hamutuk funsionáriu sira no instituisaun tuteladu sira iha Salaun Ministériu, Caicoli, Díli.

Tuir mai sumáriu atividade Ministra no Vise-Ministra nian durante fulan 6, hahú husi Jullu - Dezembru 2023.

Enkontru Konsellu Ministrus dahuluk.

Hafoin simu pose, membru governu konstitusionál da-9 hahú reuniaun traballu durante loron 5 nia laran, husi loron 4 to'o loron 9 Jullu 2023. Ministra Verónica das Dores no Vise Ministra Céu Brites mós partisipa iha reuniaun traballu ne'ebé lidera husi Sua Exelência Primeiru-Ministru Kay Rala Xanana Gusmão iha sala reuniaun Conselho de Ministros, Palácio do Governo.

Iha reuniaun traballu ne'e membru governu sira fahe hanoin no diskuti polítika Governu da-9 nian hodi prepara planu ba liña ministeriais, tuir sira nia área servisu.



Ministra Verónica das Dores ho Vice-Ministra Céu Brites partisipa iha jantar konfraternizasaun ho delegasaun Portugal

Iha loron 25 Jullu 2023, Ministra Verónica das Dores ho Vice-Ministra Céu Brites akompaña Primeiru-Ministru Kay Rala Xanana Gusmão ho membru Governu Konstitusionál da-9 oferese jantar konfraternizasaun ba Primeiru-Ministru Portugal António Costa ho delegasaun iha Palácio Nobre, Lahane, Díli.

Iha Jantar ne'e Ministra MSSSI akompaña direta ninia omólogo Ministra Traballu, Solidariedade no Seguransa Sosiál, Ana Mendes Godinho.



Ministra Verónica das Dores ho nia omólogo Ana Mendes Godinho kondorda asina akordu ko-finansia 50%:50% ba apoiu ISS.

Iha sorumutu pequeno almoço iha Otél Timor, Díli loron 26 Jullu 2023, Ministra Verónica das Dores no Vice-Ministra Céu Brites diskuti ho Ministra Traballu, Solidariedade no Seguransa Sosiál Portugal, Ana Mendes Godinho kona-ba prioridade serbisu no kooperasaun entre ministériu rua ne'e ba tinan 2023-2028. Objetivu prinsipál mak prioritiza programa kooperasaun no marka tempu hodi aselera implementasaun Konvensaun Seguransa Sosiál ne'ebé asina hosi governu anteriór iha 29 Juñu 2022. Konvensaun Seguransa Sosiál ne'e instrumentu legál vinkulativu atu énfaze asuntu direitos no deveres traballadores Timoroan iha Portugal no traballadores Portugueza iha Timor. Konvensaun ne'e garante traballadores, tantu iha Portugal no Timor, sira nia direito ba pensaun wainhira reforma no fila hikas ba sira nia rain. Ministra nain rua aseita ona tempu asina Akordu Administrativa ba konvensaun ne'e iha Outubru 2023, iha Portugal. Ministra MSSI ho nia omólogo renegosia no aseita persentajem ko-finansiamentu ba Instituisaun Solidariedade Sosiál (ISS) iha Timor-Leste ho pursentu 50%: 50% entre governu rua ne'e.



Ministra Verónica das Dores ensera Kursu Estensaun Alargamentu ba Kobertura Protesaun Sosiál.

Kursu ne'e fasilita husi Organizasaun Internasionál Traballadores (ILO, sigla inglez) hodi kapasita funsionáriu sira husi Institutu Nasionál Seguransa Sosiál, MSSSI, SEFOPE no Sociedade sivíl.

Kursu ne'e la'ó durante loron 5, hahú husi loron 24 to'ó 28 fulan Jullu, iha Hotel Timor, Díli. Formasaun ne'e realiza tanba serbisu hamutuk ho ILO no ACTION Portugal hodi kapasita formandu sira hodi bele hametin liután servisu Protesaun Sosiál iha Timor-Leste.



Enkontru dahuluk Ministra no Vise-Ministra ho kargu xefia sira.

Ministra Verónica das Dores ho Vise-Ministra Céu Brites fahe polítika Governu

Konstitusional da-9 nian ba kargus xefia husi diresaun sira, Sentru Solidariedade Sosiál Munisípius, Sentru Nasionál Reabilitasaun (CNR-sigla Portugés), Instituisaun



Autónomu tuteladu sira, iha salaun MSSI Kaikoli Dili, iha 31 Jullu 2023. Polítika ne'ebé implementa inklui separasaun INDDICA ho INCSIDA husi MSSI, no tutela ba Vise-Primeiru Ministru no Ministru Koordinadór Asuntus Sosiais no Ministru Dezenvolvimentu Rurál no Abitasaun Komunitária, tuir Dekretu-Lei nú.

46/2023; revizaun ba ezekusaun OJE 2023 nian no mós hadi'ak servisu sira iha área sosiál inklui pagamentu pensaun sosiál ba idozus, Ema ho Defisiéncias, no Bolsa da Mãe kondisionál.



Ministra Verónica das Dores vizita Sentru Solidariedade Sosiál Munisípiu Viqueque (SSSM-V).

Vizita iha loron 1 Agostu 2023 ne'e, Ministra enkontru ho funsionáriu sira no rona preokupasaun sira ne'ebé hasoru durante ne'e. Problema ne'ebé SSSM-V ne'e hasoru mak sidauk iha substituisaun ba diretór ne'ebé mate ona, seidauk iha edifísiu no menus rekursu umanus. Iha okaziaun ne'e, Ministra mós ba haree progresu konstrusaun edifísiu foun sentru nian, no orienta atu aselera prosesu kontrusaun. Ministra afirma, iha tempu badak ministériu sei halo desizaun hodi nomeia diretór foun atu garante funsionamentu servisu sira iha sentru ne'e.



Ministra Verónica das Dores ho Vice-Ministra Céu Brites enkontru ho Country Representative UNICEF, Bilal Durrani.

Enkontru iha loron 3 Agostu 2023 ne'e atu hametin liután kooperasaun serbisu iha área prioridade tolu mak hanesan: Lei protesaun ba labarik, Polítika bem-estár sosiál ba labarik no formasaun profisionál ba funcionáriu sira.

Ajénsia ONU ne'e, husu MSSI atu lori no defende ezbosu estratéjia no polítika protesaun labarik iha reuniaun Konsellu Ministrus, haree ba importánsia husi lei ne'e ba servisu protesaun labarik Timor-Leste, iha futuru.



Enkarregada Embaixadóra Austrália, Caitlin Wilson felisita Ministra ho Vise-Ministra ba nomeasaun hodi lidera MSSI ba mandatu 2023-2028.

Iha enkontru kortezia loron 3 Agostu 2023 ne'e, Ministra mós hato'o agradesimentu ba Governu Austrália, nu'udar Timor-Leste nia parseiru dezenvolvimentu ne'ebé durante ne'e fó apoiu mai Timor-Leste iha área oioin.

Iha enkontru kortezia ne'e Governu Austrália kompromete atu fó apoiu nafatin ba programa ministériu nian, inklui formasaun ba funsionáriu liuhosi programa kapasitasaun rekursu umanus.



Orfonatus 85 simu Ministra Verónica das Dores iha Colégio Órfãos Dom Bosco iha Fuiluro.

Iha loron 4 Agostu 2023, labarik no foinsa'e orfão sira expresa sira nia haksolok hodi simu Ministra Verónica das Dores iha sira nia leet. Ho liafuan domin sira bem-vinda Ministra ne'ebé nu'udar inan ida vizita oan sira hodi haree sira prezisa lorloron nian. Ministra haree direta kondisaun orfão sira no komprende hodi asegura política governu nian liuhosi MSSI bele continua tau matan labarik no foin-sa'e orfão sira. Ministra enkoraja sira atu estuda maka'as hodi bele hetan futuru ida di'ak no bele sai futuru lider ba rai ida ne'e.



Ministra Verónica das Dores vizita Sentru Solidariedade Sosiál Munisípiu (SSSM) Lautem.

Vizita traballu iha loron 4 Agostu 2023 ne'e atu haree besik liu servisu atendimentu iha sentru sira. Ministra halo enkontru ho Diretór SSSM no funsionáriu sira iha sala enkontru SSSM nian hodi rona no buka hatene prekupasaun sira ne'ebé durante ne'e hasoru. Sentru Lautem iha problema ho menus rekursus umanus no facilidade tanba área kobertura ne'ebé luan.



Vise-Ministra Céu Brites vizita Sentru Solidariedade Sosiál Munisípiu (SSSM) Liquiça.



Iha loron 8 Agostu 2023, Vise-Ministra ba haree direta kondisaun jerál iha sentru ne'e no rona prekupasaun husi dirijente ho funsionáriu sira, no buka solusaun hodi hadi'a servisu asisténsia sosiál ba grupu vulneravel iha munisípiu ne'e. Vizita ne'e atu hakbesik liután hodi hametin kooperasaun no koordenasau servisu husi nasional ba munisípiu. Aleinde haree armazén ho rezervasau ain-han ne'ebé utiliza ba apoiu umanitaria, Vise-Ministra mós ba observa progresu konstrusaun edifísiu foun Liquiça nian ne'ebé la'o hela. Sentru ne'e hasoru problema kuaze hanesan ho sentru seluk maibé liña internet sai prekupasaun boot liu.

Vise-Ministra vizita Sentru Solidariedade Sosiál (SSSM) Ermera.

Iha loron 8 Agostu 2023, Vise-Ministra Céu Brites vizita no rona preokupasaun funsionáriu sira nian no solusiona problema ne'ebé infrenta. Hanesan ho sentru sosiál sira seluk, funsionáriu sentru Ermera mós agradese ba prezensa Vise-Ministra iha sira nia leet. Vise-Ministra afirma objetivu husi vizita ne'e atu hakbesik liu tán ba funsionáriu sira, hametin kooperasaun hosi servisu sentrál ho sentru sira hodi bele implementa programa Ministériu nian ba tinan 5 oin mai ho efetividade. Vise-Ministra informa prioridade programa MSSSI liga ho polítika governu da-9 nian aleinde programa sosiál, iha mós prioridade seluk hanesan hadi'ak servisu atendimentu ba comunidade sira liuhosi Sentru Sosiál sira ne'ebé instaladu iha munisípiu. Kuaze sentru sira hasoru difikuldades hanesan iha área rekursus umanus, fasilidade no ligasaun internet no mós atendimentu públiku.



Ministra Verónica das Dores lansa Pensaun Pensaun Sosiál.

Iha loron 9 Agostu 2023, MSSSI lansa pagamentu Pensaun Sosiál ba ferik no katuas nomós Ema ho Defisiénsia (EhD) ba tinan 2023. Ministra Verónica das Dores anúnsia ba públiku, pagamentu pensaun sosiál ne'e implementa simultaneamente iha munisípiu hotu iha territóriu



tomak, iha loron 14 fulan Agostu 2023. Ba poupansa sira iha Banku Mandiri, BRI no BNU, benefisiáriu sira bele halo levantamentu liuhosi konta bankária. Ba sira ne'ebé seidak iha konta bankária, pagamentu sei halo direta. Ekipa pagamentu mós tulun benefisiáriu hirak ne'ebé labele hakat ba fatin pagamentu, hodi bele hetan sira nia osan ne'e. Dekretu Lei Nú.53/2022 afirma Pensaun Sosiál ba ferik no katuas no EhD sira, ho montante \$57 kada ema, kada fulan. Pagamentu ne'e faze fulan 6 uluk iha tinan 2023 no kontinua kedas ho pagamentu daruak nian. Totál benefisiáriu sira hamutuk 99, 564 husi munisípiu 12 no RAEOA, no husi numeru ne'e EhD hamutuk 8.781 ho total orsamentu \$ 3.052.680.



Vise-Ministra Céu Brites vizita Sentru Solidariedade Sosiál (SSSM) munisípiu Aileu.

Iha 11 Agostu 2023 Vise-Ministra hasoru funsionáriu sira iha sentru ne'e hodi rona preokupasaun ne'ebé iha. Vizita ne'e nu'udar programa Ministra no Vise-Ministra nian hodi apár ho servisu no funsionamentu sentru sira nian iha baze. Vizita ne'e mós atu identifika difikuldade no dezafiu sira inklui observa facilidade sira no buka dalan atu rezolve problema ne'ebé infrenta. Difikuldade ne'ebé SSSM Aileu iha mak menus rekursus umanus, funsionáriu sira halo knnar dupla, hanesan mós sentru sira seluk. Transporte no facilidade komunikasaun mós sai dezafiu ida. Vise-Ministra promete sei buka solusaun ba problema hirak ne'e atu bele fasilita servisu atendimentu públiku iha munisípiu ne'e.

Vise-Ministra mós aborda kona-ba serbisu auditoria ne'ebé sai prioridade Primeiru Ministru nian atu garante fila-fali serbisu tansparénsia ba futuro. Aleinde ne'e, Vise-Ministra mós vizita edifisiu foun sentru no detekta defeitus balun ne'ebé kompañia responsavel projetu implementa no sei apresenta detallus ba Ministra hodi tetu no decide ba kontinuasaun obra.



Ministra MSSSI, SEFOPE no SEKOMS akompañá Primeiru-Ministru vizita Centro Nasionál Reabilitaçã (CNR).

Iha Sábada fim de semana lora 12 Agostu 2023 ne'e, Ministra Verónica das Dores hamutuk ho Sekretáriu Estadu Rogério Araújo Mendonça no Sekretáriu Estadu Expedito Dias Ximenes akompañá Primeiru-Ministru Kay Rala Xanana Gusmão ba vizita CNR iha Becora, Díli. CNR nu'udar instituisaun tutelada ida ba MSSSI. Vizita ne'e hodi haree edifisiu CNR ne'ebé SEFOPE utiliza hela no haree patrimóniu ne'e bele entrega hikas ba CNR. Aleinde ne'e, PM ho nia governante sira mós observa konstrusaun moru ne'ebé halo la tuir prosesu aprovizionamentu nune'e bele hadi'a mekanizmu hodi hametin administrasaun no jestaun ho diak.



Aprovasaun Lei Orgániku MSSSI

Lei Orgániku MSSSI aprova iha Konsellu Ministrus hafoin apresenta husi Ministra Verónica das Dores, iha salaun Reuniaun PCM, Palácio do Governo, iha loron 16 Agostu 2023.

MSSI nia área servisu kobre áreas protesaun sosiál, assisténsia sosiál, reinsersaun komunitária, inkluzsaun sosiál, no servिसus kooperativas inklui instituisaun no administrasaun indireta hanesan Institutu Nasionál Seguransa Sosiál (INSS), Centro Nacional de Reabilitação (CNR) no Fundu Reserva Seguransa Sosiál (FRSS).

Ministra Verónica das Dores vizita maluk defisiénsia iha suku Saburai, Munisípiu Aileu.

Lihosi publikasaun RTTL.EP iha loron 16 Agostu kalan, João Manuel Rego, Ema ho Defisiénsia ida, seidak hetan assisténsia sosiál. Nune'e, iha loron 17 Agostu Ministra Verónica ba kedas hodi haree direta João nia kondisaun. Ministra apresia ho servisu RTTL.EP nian hodi apresenta kondisaun réal ema vulneravel sira nian nune'e bele hetan atensaun imediata husi instituisaun relevante hanesan MSSSI. Ministra afirma assisténsia ne'ebé iha, João tenki simu. Iha fulan Setembru 2023 ne'e, João bele simu ona ninia pensaun sosiál.



Ministra, Vice-Ministra ho governante sira akompaña Primeiru-Ministru apresenta Proposta Lei Orsamentu Retifikativu iha Parlamenu Nasionál.

Iha debate especialidade loron 22 to'o 24 Agostu 2023, Ministra Verónica das Dores ho Vice-Ministra Céu Brites hamutuk ho membru Governu Konstitusionál da-9 akompaña Primeiru-Ministru, Kay Rala Xanana Gusmão apresenta Proposta Lei Orsamentu Retifikativu iha Parlamenu Nasionál. Orsamentu Retifikativu ba MSSI aprovalu iha debate especialidade iha loron 23 Agostu 2023, ho votus Afavor:59, Kontra:0 no Abstensaun:5 ba total orsamentu \$30.217.108. Montante ne'e aloka ba saláriu no vensimentu \$4.272.253, bens no servisus \$3.553.239, transferéncias públikas \$20.464.436, kapital menor \$321.900 no kapital desenvolvimentu \$1.605.280 ba orsamentu Jullu-Dezembu 2023.



Ministra Verónica das Dores akompaña husi Vise-Ministra Céu Brites enkontru kortezia ho Country Director Asian Development Bank (ADB).

Iha loron 25 Agostu 2023

Ministra no Vise-Ministra simu
Country Director ADB Stefania
Dina iha edifisiu sentrál MSSI
Kaikoli. ADB atualiza programas
kooperasaun serbisu entre MSSI
ho ADB durante ne'e no ba



futuru. Iha enkontru amigável ne'e, explora mós asuntos importante ne'ebé
parseirus nain rua koloka mak hanesan programas Governu Konstitusionál da-
9 nian. Pontus kulminante iha enkontru ida-ne'e maka ADB oficialmente
konvida Ministra hodi partisipa iha Semináriu Protesaun Sosiál, ne'ebé hala'o
iha Manila, husi loron 26-28 Setembru 2023.



Ministra Verónica das Dores participa iha reuniaun Konsellu ASEAN iha Jakarta, Indonézia.

Reuniaun ASCC dala-30 iha Jakarta, Indonesia iha 29 Agostu 2023 ne'e ho tema "ASEAN Matters: Epicentrum of Growth" ho objetivu hametin no dezenvolve asuntu inkluzivu, defisiénsia, igualdade jéneru, tau matan no fó edukasaun sedu ba labarik ne'ebé sai hanesan responsabilidade komum entre nasaun membru ASEAN nian hodi hamosu sustentabilidade ida ne'ebé reziliente no inkluzivu. Iha intervensaun, Ministra kongratula nasaun membru ASEAN tanba premite Timor-Leste participa ho estatutu observadór. Ministra enfaze problema partisipasaun labarik iha edukasaun, saúde pública, igualdade jéneru, no hatutan Primeiru-Ministru nia votus apresiasaun ba diskusaun estratéjiku ida-ne'ebé produtivu. Reuniaun ne'e importante ba Timor-Leste atu aprende, avalia no komprende progresu, dezafiu no oportunidade sira, inklui prioridade relevantes ne'ebé prezisa hodi aselera kooperasaun sosiu-kulturál ASEAN nian. Importante liu-tan, MSSI bele hakle'an koñesimentu nu'udar Ministériu Koordenadór ba Pilar ASCC.



Vise-Ministra Céu Brites vizita Sentru Solidariedade Sosiál Munisípiu (SSSM) Ainaro.

Iha enkontru ho funsionáriu sira iha loron 1 Setembru 2023 ne'e, Vise-Ministra husu funsionáriu atu hatudu nafatin profesionalizmu iha servisu. Vice-Ministra rona preokupasaun no rekomendasaun funsionáriu sira nian inklui haree facilidade servisu iha sentru ne'e. Difikuldade ne'ebé sentru ne'e hasoru mak forsa traballu mínimu inklui mobiliáriu ba funsionáriu atu halo servisu no mós kombustivél ba kareta operasionál no motorizadas hodi hala'o atendimentu ba comunidade sira.

Benefisiáriu subsidiu ba ferik ho katuas, ema balun seidak hetan sira ninia direitu, tanba Billete Identidade (BI) seidak iha. Vise-Ministra afirma, ba futuru presiza iha koordenasan no komunikasan di'ak liután hodi bele hadi'ak no buka solusaun ba dezafiu sira ne'ebé sentru ne'e iha. Benefisiáriu ferik ho katuas sira ne'ebé hasoru problema ho Billete Identidade (BI), Ministériu sei ko'alia ho BNCTL hodi buka solusaun. Iha vizita ne'e Vise-Ministra mós observa progresu konstrusaun edifisiu foun sentru Aileu nian.



Ministra Verónica das Dores vizita Sentru Solidariedade Sosiál (SSSM) Baucau.

Iha Tersa 5 Setembru 2023, Ministra enkontru ho funsionáriu SSSM Baucau hodi rona difikuldade no obstákulu ne'ebé infrenta durante ne'e, liuliu oinsa hadi'ak atendimentu servisu sosiál sira. Iha intervensaun Ministra apresia ho progresu serbisu SSM Baucau ne'ebé la'ó di'ak no informa mós ba funsionáriu sira katak vizita ne'ebé Ministra no Vise-Ministra halo ba SSSM atu hakbesik ba funsionáriu sira hodi hametin koordensaun servisu no identifika estratejia hodi rezolve problema sira hodi eleva kualidade atendimentu servisu sosiál nian ba populasaun. Ministra mós vizita Uma Mahon, ISS Pradet, ISS Eskola Santa Maria Boruma hodi haree funsionamentu instituisaun solidariedade sosiál sira ne'e.



Ministra Verónica das Dores vizita Sentru Solidariedade Sosiál Munisípiu (SSSM) Manatuto.

Iha 5 Setembru 2023 Ministra hasoru funsionáriu SSSM Manatuto hodi rona preokupasaun sira no buka hadi'ak atendimentu sosiál ba grupu vulneravel iha munisípiu ne'e. SSSM Manatuto iha difikuldade ho forsa traballu ne'ebé mínimu, fasilidades servisu limitadu, kombustivél ba veikulu no motorizadas la sufisiénte hodi fó atendimentu ba comunidade sira. Difikuldade seluk mak benefisiáriu subsidiu ferik ho katuas balu seidauk hetan sira ninia direitu tanba Billete Identidade (BI) seidauk iha.

Ministra informa governu halibur hela dadus atu bele trasa planu asaun ba 2024 hodi responde ba problema povu nian. Ministra enkoraja funsionáriu sira atu manda preokupasaun sira iha forma eskrita ou mensajen direta ba gabinete Ministra no Vise-Ministra atu fó resposta no fó apoiu.



Vise-Ministra Céu Brites partilla Timor-Leste nia esperiênsia utilizasaun siênsia no teknolojia, iha China-ASEAN Women's Forum.

Fórum ne'e iha Liuzhou, rejiaun autónoma Guangxi Zhuang, iha 15 Setembru 2023 ho tema "Inovasaun iha Siênsia no Teknolojia ba Dezenvolvimentu Feto." Forum ne'e mós hanesan eventu ba 20^a Expo China-ASEAN hodi lansa iniciativa Fórum Feto China-ASEAN 2023.

Iha intervensaun Vise-Ministra haktuir situaun desagradavel ne'ebé Timor-Leste hakat-liu hafoin independênsia, ne'ebé estadu no governu fó atensaun ba enkuadramentu legál internasionál

no nasional ne'ebé iha relasaun ho Objektivu Dezenvolvimentu Sustentavel hodi halo projesaun sistemátiku iha estadu no programa governu nian.

Enkuadramentu legál sira ne'e utiliza nu'udar instrumentu hodi eleva kapasidade feto Timor-Leste no promove biban ba envolvimentu feto iha âmbito empoderamentu feto iha dezenvolvimentu no utilizasaun plataforma dijital no ekonomia dijital, nune'e mós iha kultivasaun feto iha talentu siênsia no teknolojia. Vise-Ministra emfaze rezultadu boot ida-ne'ebé Timor-Leste orgullu mak to'o lejislasaun atuál, 38% husi kadeira sira iha Parlamentu Nasionál asumi husi feto no ida ne'e hatudu envolvimentu feto Timor-Leste lidera ho número ne'ebé aas liu iha Ázia Pasífiku.



Vise-Ministra Céu Brites komemora Loron Mundiál ba Lian Jestuál hamutuk ho Defisiénsia tilun.

Ho lian jestuál Vise-Ministra komunika ho comunidade defisiénsia tilun ne'ebé celebra Loron Mundial Lian Jestual ba daruak iha Timor-Leste. Eventu ne'e akontese iha Suku Fatukero, Postu Railaco, Munisípiu Ermera. Loron 23 Setembru 2023 nu'udar loron espesial ba comunidade defisiénsia tilun hodi promove lian jestual Timor-Leste nian. Iha okaziaun ne'e Vise-Ministra reprezenta Ministra hato'o parabéns ba comunidade defisiénsia tilun hotu iha Timor-Leste. Selebrasaun loron



mundia ida-ne'e organiza husi Klibur Defisiénsia Tilun Timor-Leste (KDT-TL) hamutuk ho Asosiasaun Defisiénsia Timor-Leste (ADTL) ho sentidu atu promove lian jestual Timor-Leste no valoriza maluk defisiéns tilun sira nia esforsu, programa no advokasia ba inklusaun sosiál. KDTL ho apoiu husi setór defisiénsia inklui ADTL dezenvolve ona lian jestual hanesan lian nasionál ida iha Timor-Leste. Eventu ida ne'e atu kontinua promove utilizaun Lian Jestual iha Timor-Leste.

Vise-Ministra Céu Brites vizita ekipa reajustamentu dadus agregadus familiares ba programa Bolsa da Mãe.

Iha loron 23 Setembru 2023, Vise-Ministra Céu Brites tun ba haree direta ekipa reajustamentu dadus ne'ebé halo hela servisu iha Aldeia Poana, Suku Humboe, Postu Administrativu Ermera. Vizita ne'e atu observa progresu servisu iha terenu no motiva funcionáriu sira. Vizita ne'e hala'o hafoin participa iha selebrasaun Loron Mundial Lian Jestual, iha Suku Fatukero, Postu Railaco, Munisípiu Ermera. Ekipa reajustamentu dadus kompostu husi funcionáriu husi nasionál ho tékniku sosiál munisípiu, Diretór Sentru Solidariedade Sosiál Munisípiu, no kolabora mós ho Xefe Aldeia no comunidade. Vise-Ministra mós husu ekipa atu alista no relata situasaun saida de'it mak sira hasoru iha terenu no rekomenda mós aprosimasaun hodi hadi'ak liután programa Bolsa da Mãe.



Vise-Ministra Ceu Brites loke kolókiu sensibilizasaun kona-ba Ema ho Defisiénsia ba Polísia Nasionál.

Eventu ne'e realiza iha Akademia PNTL, Comoro Díli iha loron 26 Setembru 2023. Vise-Ministra rekoñese papél Programa Dezenvolvimentu Polísia Timor-Leste (PDP-TL) importante tebes atu apoiu ofisiál no komandante polísia sira, hodi fó suporta ba grupu vulneravel sira. Nu'udar Ministériu prinsipál ne'ebé dezenvolve no koordena implementasaun polítika inkluzoan defisiénsia no programa protesoan sosiál, MSSI iha kompromisu boot ba implementasaun polítika promosaun no protesoan direitu Ema ho Defisiénsia nian liliu Planu Asaun Nasionál ba (PAN-EhD 2021-2030).

PAN EhD ne'e sai nu'udar kompromisu Ministériu 11 nian ho mekanizmu implementasaun ne'ebé integradu no kolabora ho organizasaun EhD. Timor-Leste ratifika ona Konvensaun Internasionál ba Direitu EhD (UNCRPD-sigla inglez) iha 17 Janeiru 2023. Nune'e Vice-Ministra enkoraza atu ema hotu la'otuir prinsípiu inkluzoan defisiénsia *"nothing about us without us"* no asegura programa sira sei la husik ema ida iha kotuk.



Timor-Leste participa iha Semana ASIA PACIFIC ba Protesaun Sosiál.

Iha Manila, iha loron 26-28 Setembru 2023, Delegasaun MSSSI, lidera hosi Ministra Verónica das Dores, aleinde participa iha konferéncia ne'e hodi rona no aprende hosi nasaun sira seluk, Ministra mós participa iha diskusaun painél nível aas kona-ba protesaun sosiál integradu. Ministra apresenta programa Bolsa da Mãe nu'udar programa ida ne'ebé promove koordinasaun no kolaborasaun inter-ministerial, ho esforsu governu hodi dijitaliza sistema pagamentu ba benefisiáriu sira.

Programa Bolsa da Mãe Jersaun Foun remata iha 31 Dezembru 2023, hafoin orsamentu fiskál 2024 la pasa iha Komisaun Revizaun Orsamentu. Iha Manila delegasaun mós halo enkontru kortezia ho Lideransa ASEAN Development Bank (ADB), fasilita hosi Country Leader ADB iha Timor-Leste. ADB iha Manila akresenta, pruntu apoiu protesaun sosiál wainhira MSSSI presiza. MSSSI mós iha enkontru

ho WFP iha Manila hodi explora possibilidade parseria iha futuru. Iha konferéncia ne'e, Presidente Timor-Leste, Jose Ramos Horta iha nia diskursu, ko'alia ba audiénsia kona-ba papél importante protesaun sosiál nian hodi hasa'e rezultadu dezvoltamentu úmanu, ho foku spesífiku ba nutrisaun no kuidadu saúde. Lisaun importante participa iha konferéncia Protesaun Sosiál Ázia-Pasífiku ne'e ba MSSSI mak lisaun no informasaun sira bele sai referénsia



no dalan ba oin, ba sistema proteasaun sosiál nasaun nian, tuir mudansa mundu ne'ebé la'ó ho lalais tebes. Lisaun importante sira inklui balansu lei dezvoltimentu, hodi responde ba dezafiu dezeńu sistema proteasaun sosiál ida ne'ebé iha balansu ho limitasaun orsamentál, redistribuisaun riku-soin no efisiénsia operasionál. Kresimentu inkluzivu liuhosi proteasaun sosiál, prezisa haree mós proteasaun sosiál ba moris tomak, koordenaun no governasaun sai xave ba susesu iha implementasaun no oportunidade atu esplora no reforsa dijitalizaun no monitorizaun. Iha rezumu, MSSI tenke konsidera lisaun prinsipál sira ne'e atu la'o ba oin. Liuhosi konsidera balansu entre dezeńu ka planu, inkluziun, dijitalizaun no koordenaun efetiva, Timor-Leste bele hametin ninia sistema proteasaun sosiál hodi hasoru dezafiu sira ne'ebé kontinua evolui tuir mudansa iha mundu, asegura sidadaun sira nia moris di'ak no promove dezvoltimentu sustentável.



Haktuir Plenos Poderes husi Primeiro Ministro autoriza Ministra MSSSI lori naran RDTL, asina akordu bilaterál 2 ho Governu Portugal.

Iha Portugal, loron 2 Outubru 2023 Ministra Verónica das Dores ho nia omólogo Ana Mendes Godinho asina Acordo Administrativo para a aplicação da Convenção sobre Segurança Social entre a República Portuguesa e a República Democrática de Timor Leste. Nomós Memorando de Entendimento entre o Ministério do Trabalho, Solidariedade e Segurança Social da República Portuguesa e o Ministério da Solidariedade Social e Inclusão e a Secretária de Estado da Formação Profissional e Emprego da República Democrática de Timor Leste. Nune'e administrativamente hahú aplika konvensaun seguransa sosiál entre nasaun rua ne'e hodi garante mobilidade no sirkulasaun traballadór nasaun rua nian. Konvensaun ne'e asina iha Juñu 2022, iha Díli, ho objetivu atu proteje direitu seguransa sosiál ba traballadór ou sidadaun nasionál Timor-Leste no Portugal.



WFP konvida Ministra MSSSI partísipa iha plenaria Komité ba Seguransa Aihan dala-51 iha Roma.

Iha Roma, lora 26-28 Outubru 2023, Delegasaun Timor-Leste husi MSSSI, Ministra Verónica das Dores akompaña husi Embaixadora TL ba Roma/Vatikanu, partísipa iha diskusaun painél ne'ebé permite TL sai atensaun no hatudu atinzimentu iha area protesaun sosiál relaciona ho seguransa alimentár ba grupu marzinalizadu sira. Ho panel sira seluk, TL konsege hatudu katak protesaun sosiál ne'ebé governu lidera nu'udar fatór xave ida ba susesu nomós prezensa G7+ iha Roma hatudu nasaun sira terseiru-mundu iha risku boot ba dezastre no prezisa sistema protesaun sosiál forte ida atu garante vulnerabilidade sira hetan kuidadu. Delegasaun mós iha diskusaun produtivu tebes ho Xefi Unidade Protesaun Sosiál WFP no mós ho Pakistaun ne'ebé partísipa mós iha painél ne'e. Panelista sira mak Timor-Leste, Brazil, Pakistaun, Kolombia, Nigeria (virtual) no G7+. Panelista sira iha preokupasaun hanesan kona-ba fó subsídiu la tulun maneira han ai-han nutritivu no saudavel tanba la garante montante ne'e bele sosa ai-han saudavel, liliu tanba ai-han hirak ne'e folin karun no ema la hatene ai-han saudavel alternativu i mós dalaruma la fa'an iha merkadu. Ho prezensa El Niño nian panelistas estimativa sei iha impaktu ba koilletas no disponibilidades ai-han iha merkadu ho nune'e fó subsídiu sei hatudu impaktu boot. Iha diskusaun ne'e, MSSSI afirma katak prioridade importante balun mak apoiu tékniku no fornesimentu ai-han nutritivu ne'ebé di'ak tuir kompeténsia prinsipál WFP nian.



Ministra Verónica das Dores participa iha “ASEAN High-Level Forum on Disability-Inclusive Development and Partnership Beyond 2025.”

Eventu ne'e realiza durante loron 3, husi 10-12 Outubru 2023 iha Makasar-Indonesia, participa husi nasaun membru ASEAN inklui Timor-Leste nu'udar observadór. TL hetan priviléjiu participa hodi fahe hanoin no aprende ho nasaun membru sira seluk kona-ba kompromisu sira iha dezvoltamentu inkluzivu. Iha intervensaun badak, Ministra informa, Governu TL halo ona esforsu no kolabora ho di'ak tebes ho organizasaun Ema ho



Defisiénsia (EhD), ministéris relevantes, Parlamentu Nasionál hodi hametin igualdade no protesaun sosiál ba ema hotu inklui EhD ne'ebé hatur iha Artigu 21 Konstituisaun RDTL. Timor-Leste bazeia ba rezolusaun governu aprova Polítika Nasionál EhD (PAN-EhD) iha tinan 2012, Rezolusaun Parlamentu Nasionál ne'ebé aprova lejislasaun sira ne'ebé presiza atu proteje no promove direitu ba EhD, nomós rezolusaun governamentál ne'ebé aprova PAN-EhD tinan 2021-2030 iha inísiu 2021. Husi rezolusaun hirak ne'e permite ministériu no entidade seluk atu serbisu hamutuk hametin kolaborasaun no koordenasan hodi implementa PAN EhD no asegura alokasaun orsamentu governu kada tinan.

Vise-Ministra Céu Brites vizita Sentru Solidariedade Sosiál Munisípiu (SSSM) Manufahi.

Iha 20 Outubru 2023 Vise-Ministra halo vizita ba SSSM Manufahi no enkontru ho jestór no funsionáriu sira hodi rona preokupasaun no rekomendasaun sira inklui haree facilidade servisu atendimentu iha sentru ne'e. Vise-Ministra mós partilla programa prioridade Governu Konstitusionál da-9 nian, liliu programa MSSI nian. Sentru ne'e hasoru problema menus rekursus umanus; funsionáriu balu servisu tinan barak ona maibé sei ho estatutu kontratadu; falta transportes; la iha armazen no mós prosesu atendimentu ba pagamentu benefisiáriu ferik ho katuas sira ne'ebé hala'o husi BNCTL, ne'ebé ladun di'ak. Vise-Ministra afirma tau konsiderasaun ba preokupasaun hotu no sei servisu hamutuk fó solusaun ba problema sira ne'e no husu funsionáriu sira atu servisu ho di'ak, iha kooperasaun no komunikasaun ne'ebé di'ak hodi hala'o atendimentu sosiál ho kualidade ba comunidade sira, liliu ba sira ne'ebé mak moris iha kondisaun vulnerável.



Vise-Ministra Céu Brites, vizita Sentru Solidariedade Sosiál Munisípiu (SSSM) Bobonaro.

Iha loron 30 Otubru 2023, Vise-Ministra hasoru jestór no fusionáriu sira iha SSSM Bobonaro hodi rona prekupasaun no rekomendasaun sira, no observa direta kondisaun iha sentru ne'e. Vizita ne'e konklui ona Ministra no Vise-Ministra nia programa vizita ba SSSM sira. SSSM ne'e rekomenda atu hari'i edifísiu foun tanba edifísiu atuál nia kondisaun la favoravél atu hala'o servisu. Sira mós prezisa kapasitasaun iha área importante protesaun sosiál inklui jestaun no administrasaun. Asuntu fasilidades hanesan komputadór no printer, transportes inklui konbustivél sai mós sira nia preokupasaun. Vise-Ministra toma-nota ba preokupasaun no rekomendasaun sira ne'e no asegura no konsidera iha planu atu hadi'ak.



Ministra Verónica das Dores ho Vice-Ministra Céu Brites apresenta planu orsamentu fiskál 2024 ba Primeiru Ministru no Komite Revizaun Orsamentu (KRO).

Iha loron 7 Novembru 2023, Ministra ho Vice-Ministra akompaña husi Diretores Jerais, Diretores Nasionais no Xefe Departamentu sira apresenta planu orsamentu MSSI ba tinan fiskal 2024. Liuhosi diskusaun no justifikasaun ba planu no programa, ikus mai Primeiru-Ministru ho KRO aprova orsamentu MSSI nian ho montante \$20,732,817 miloens. Totál orsamentu ida-ne'e sei aloka ba kategória lima (5): Saláriu vensimentu, Bens Servisu, Kapitál minór, Kapitál

Dezenvolvimentu inklui Transferénsia Públika. Iha aprovasaun ne'e, aprova mós orsamentu ba instituisoens tuteladas MSSI nian inklui Sentru Nasionál Reabilitasaun no Institutu Nasionál Seguransa Sosiál (INSS). Iha sesaun ne'e KRO ne'ebé lidera husi Primeiru-Ministru rezeita orsamentu ba programa Bolsa da Mãe Jerasaun Foun (BdM-JF) no rekomenda MSSI fó atensaun no hadi'ak mekanizmu implementasaun programa Bolsa da Mãe Kondisionál.



Reprezentante UNICEF, Bilal Aurang Zeb Durrani atualiza programa servisu ba Ministra Verónica das Dores.

Enkontru koordenasaun trimestráal entre MSSSI ho UNICEF iha loron 14 Novembru 2023, hodi atualiza programa prioridades 4 ba Ministra; programa Servisu Nain Sosiál (SNS), Lei Protesaun ba Labarik, Programa Apoiu Fasilidades no Programa Parseria. UNICEF informa, UNICEF gradua ona SNS nain 8 husi MSSSI ne'ebé tuir formasaun sertifikadu III ba prestasaun servisu ba comunidade. UNICEF planu atu fó formasaun ba SNS iha Munisípiu Baucau. Nia husu MSSSI ho UNICEF atu finaliza avaliasaun ba SNS, nu'udar esforsu hasa'e kapasidade ba SNS sira. UNICEF mós husu MSSSI apoiu atu aprova Polítika Bem-Estar Sosiál ba Família, ne'ebé dadaun ne'e iha ona esbosu final ho ninia revizaun. Nune'e Ministra afirma pozisaun MSSSI nian, sei fó apoiu 100% ba polítika hotu ne'ebé ninia intensaun atu fó moris di'ak ba povu iha nasaun ida ne'e.



Ministra Verónica da Dores simu Xefe Misaun IOM Ihma Shareef hodi aborda asuntu kooperasaun servisu.

Iha loron 14 Novembru 2023, Xefe Misaun Organizasaun Mundiál ba Migrasaun (IOM-*sigla Inglez*) iha Timor-Leste, Ihma Shareef enkontru kortezia ho Ministra kona-ba programa hirak ne'ebé IOM implementa iha Timor-Leste. Husi apoiu reintegrasaun ba IDPs sira iha 2006 to'ó agora, iha programa seluk tan inklui protesaun ba sidadaun iha tempu dezastre, responde ba protesaun vitima Violensia Bazeia ba Jéneru (VBJ) inklui protesaun ba sidadaun traballadores iha rai liur. IOM mós apoiu governu hodi repatria traballador Timoroan ne'ebé hasoru problema iha Portugal. Ministra reafirma importansia serbisu hamutuk

ho parte hotu atu hodi aseguira no proteje traballadores Timoroan sira iha rai liur. IOM iha kompromisu servisu hamutuk ho MSSSI hodi buka mekanizmu atu fó protesaun ba traballador migrante Timoroan iha rai liur, hodi proteje sira la bele monu ba situasaun hanesan violénsia, explotaasaun no tráfikú úmanu. IOM hakarak servisu ho MSSSI, MNEC, SEFOPE, Ministériu Interior - PNTL, Ministériu Justisa, hodi kontinua tau-matan no fó protesaun ba traballador migrante Timoroan sira iha UK, Portugal no iha fatin sira seluk tan iha tasi-balu.



Komemora Loron Proklamasan ba 48, Ministra Verónica das Dores lidera Isar bandeira iha Baguia no Vice-Ministra lidera iha Laulara.

Iha loron 28 Novembru 2023, Ministra Verónica das Dores lidera serimónia ichar bandeira hodi komemora loron Proklamasan Unilaterál

Independénsia Repúblika Demokrátika Timor-Leste ba dala 48 iha resintu EBC Baguia Vila, suku Alaua Kraik, Postu Baguia, Munisípiu Baucau. Seremonia ne'e partisipa husi Administradór Postu Baguia, xefi suku sesante no xefi suku eleitu ho estrutura husi suku sira inklui Igreja no PNTL, estudante no

komunidade. Vice-Ministra Céu Brites lidera serimónia ichar bandeira iha Postu Laulara, Munisípiu Díli. Vise-Ministra felisita Xefe Suku eleitu ho estrutura tomak, ne'ebé populasaun Suku 5 iha postu ne'e, depózita konfiansa ba sira hodi ukun durante tinan hitu (2023-2030). Iha serimónia ofisiál ne'e mós comunidade sira, iha fatin hotu ne'ebé asisti ichar bandeira, akompaña diskursu Prezidente Repúblika Dr. José Ramos Horta liuhosi transmisaun direta iha kanál RTTL.EP. Iha seremonia ne'e mós simbólikamente entrega sertifikadu apresiasaun ba Xefi Suku sesante sira ne'eb'e ezerse ona sira nia funsaun nu'udar autoridade lokál ne'ebé besik-liu ba povu.



Vise-Ministra Céu Brites distribui pakote aihan nutritivu ba Ema ho Defisiénsia (EhD) iha RAEOA, 2 Dezembru 2023.

Pakote aihan nutritivu ne'e distribui ba EhD 105 iha Suku Costa, Upe, Oesilo no Nítibe, iha Aldeia Mahata Suku Costa Postu Pantai Makasar. Distribuisaun aihan nutritivu ne'e hanesan parte atividade ida iha âmbito selebrasaun loron Mundiál ba Ema ho Defisiénsia, ne'ebé monu iha loron 03 Dezembru 2023. Vise-Ministra dehan kuantidade aihan la-barak maibé sei hala'o kontinua, tanba presiza fó nafatin apoiu ba EhD sira haree ba kondisaun defisiénsia. Tanba sira mós iha abilidade no kreatividade, ho nune'e presiza hetan atensaun, liliu ba EhD hirak ne'ebé idade avansadu ne'ebé labele halo atividade ho independente.



Vise-Ministra Céu Brites vizita Instituisoens Solidariedade Sosiál iha RAEOA, 2 Dezembru 2023.

Instituisaun Solidariedade Sosiál (ISS) ne'ebé Vise-Ministra vizita mak Uma Mahon Paz no Sentru Sosiál Nossa Senhora de Fátima Padiæ. Objetivu vizita ne'e atu hare direta kondisaun no situasaun réal ne'ebé instituisaun hirak ne'e hasoru. Durante ne'e, instituisaun hirak ne'e servisu ona ho MSSI hodi hatutan servisu assistensia sosiál balun MSSI nian, hodi tau matan no prepara joven sira ba moris di'ak iha futuru. Instituisoens hirak ne'e mós hetan ona apoiu orsamentu husi Ministériu hodi finansia programa no atividade sira ba orfonatu no labarik abandonadu sira.



MSSI celebra Loron Mundiál ba Ema ho Defisiénsia durante loron 3 iha Díli.

MSSI kolabora ho Asosiasaun Defisiéntes Timor-Leste organiza selebrasaun Loron Mundiál ba Ema ho Defisiénsia (EhD) hahú husi loron 1-3 Dezembru 2023 iha Centro Convenções de Díli. Primeiru-Ministru Kay Rala Xanana Gusmão mak halo abertura ba selebrasaun ne'ebé marka ho tema “Unidu iha Asaun hodi Salva no Alkansa Objetivu Dezenvolvimentu Sustentavel (ODS) Ba, Ho, No, Husi Ema ho Defisiénsia.” Loron Mundiál Ema ho Defisiénsia monu iha 3 Dezembru 2023. MSSI ho ADTL mobiliza partisipasaun representante EhD husi munisipiu 12 no RAEOA, organiza mós atividade sira inklui expo produsaun no kreatividade husi maluk defisiénsia, tratamentu saude, marsa inklusivu, jantar advokasia no konsertu muzika husi EhD no artista Timoroan sira. Selebrasaun hanesan halo mós iha RAEOA, organiza husi RHTO ho prejenza Vice-Ministra Céu Brites, hodi halo abertura.



Vise-Ministra Céu Brites comemora Loron Mundiál ba Ema ho Defisiénsia (EhD) iha RAEOA.

Iha 3 Dezembru 2023, organizasaun Ra'és Hadomi Timor Oan (RHTO) organiza eventun ne'e hodi demonstra no socializa ba públiku katak Timor-Leste iha vontade atu kria sosiedade ida ne'ebé inkluzivu hodi la husik ema ida iha kotuk. Loron ne'e komemora ho marsa inklusivu ho utiliza Tum-tum (*motorizada mini-auto carro*). Vise-Ministra Céu Brites lori Governu nia naran hato'o parabéns ba EhD iha Timor-Leste tomak no afirma governu nia kompromisu atu promove no proteje direitu EhD liuhosi implementasaun Planu Asaun Nasionál Ema ho Defisiénsia (PAN-EhD) 2021-2030 no Konvensaun Direitu Ema ho Defisiénsia. TL presija hari'i tan konsellu nasionál ba ema ho defisiénsia, nune'e bele ajuda hodi implementa PAN-EhD ho di'ak liu-tan. Vise-Ministra husu parseiru hotu atu servisu hamutuk nafatin, halo sensibilizasaun direitu EhD ba públik hodi fó oportunidade iguál ba EhD nune'e sira bele partisipa másimu iha prosesu dezentvolvimentu nasionál.



Ministra Verónica das Dores no Vice Ministra Céu Brites vizita Suku Manelobas, Postu Maubisse, Munisípiu Ainaro.

Hafoin hetan konvite husi Xefe Suku Manelobas Julião Pereira Tilman, iha loron 16 Dezembru 2023, Ministra no Vice-Ministra to duni iha sira nia fatin. Suku rua, Manelobas no Mantu nia comunidade ho sira nia lia-na'in simu Ministra no Vice-Ministra ho kultura tradisionál dadolin no tara tais. Sira iha populasoun hamutuk uma kain 480. Tinan barak, desde okupasaun Indonézia, suku rua ne'e izoladu tebes; laiha estrada no laiha dezvoltamentu tanba suku Manelobas nu'udar "*Garis Merah*". Objektivu husi konvite ne'e mak comunidade hakarak hato'o pedidu ba Primeiru-Ministru hodi loke estrada atu bele liga sira ho merkadu, eskola no moris sosiál sira seluk, nune'e bele hadia sira nia moris. Sorumutu ne'e remata ho asina proposta husi Xefi Suku Manelobas no Mantu hodi entrega ba Primeiru-Ministru liuhosi Ministra MSSI.



Parlamentu Nasionál aprova OJE MSSSI iha 18 Dezembru 2023 bazeia ba planu no programa ba tinan 2024.

Ministra Verónica das Dores ne'ebé akompaña husi Vise-Ministra Céu Brites apresenta orsamentu MSSSI esklarese iha Parlamentu Nasionál kona-ba Bolsa da Mãe Kondisional, Pensaun Sosiál ba idozus, ba Herois Vivos no ba Ema ho Defisiénsia (EhD). Inklui mós informasaun kona-ba Bolsa da Mãe Jersaun Foun ne'ebé governu da-9 liuhosi Konsellu Ministru decide hodi la kontinua no la prevé orsamentu ba tinan 2024. MSSSI ba tinan fiskál 2024 nia orsamentu aprova iha faze especialidade ho votus afavor 45, kontra 1 no abstensaun 18 ba orsamentu total \$20.562.537 ho alokasaun por kategoria hanesan Salário e Vencimento \$3.778.298; Bens e Serviços Correntes \$7.199.897; Transferências Públicas; \$8.042.777; Capital Menor \$428.000; no Capital Desenvolvimento \$1.113.565.



Debate ida ne'e lidera husi Primeiru-Ministru Interinu, Eng. Mariano Asanami Sabino ne'ebé mak partisipa mós husi membru governu konstitusionál da-9.



Ministra Verónica das Dores vizita Misaun Lepra Timor-Leste iha Tibar, Postu Bazartete, Munisipiu Liquiça.

Iha loron 21 Dezembru 2023, Ministra MSSI halo vizita kortejia ba Misaun Lepra Timor-Leste iha Tibar hodi hare diretamente sira nia kondisaun réal no sira nia servisu. Ekipa Misaun Lepra apresia ho vizita Ministra nian. Ministra mós rona prekupasaun ne'ebé sira iha durante ne'e, no promete ba Misaun Lepra hodi apoiu tuir kapasidade ne'ebé iha. Ministra fó parabéns ba organizasaun ne'e, ne'ebé transforma ona ba estatutu nu'udar organizasaun nasionál hodi halo atendimentu ba ema moras lepra sira iha Timor tomak.



Ministra Verónica das Dores Vizita ba Klibur Domin-Tibar.

Ministra halo vizita kortejia ba Klibur Domin iha loron 21 Dezembru 2023 iha Tibar, Postu Bazartete, Munisipiu Liquiça. Klibur Domin nu'udar parseiru ba MSSSI iha tempu naruk ne'ebé hatutan servisu MSSSI nian liliu servisu atendimentu ba grupu vulnerável sira hodi fornese mós hela fatin temporariu ba sira ne'ebé presiza. MSSSI konsidera Klibur Domin nu'udar parseiru importante ba kliente psiko-sosiál balun ne'ebé abandonadu. Diskusaun xavi ida iha vizita ne'e kona-ba planu proposta atu hari'i Sentru Reabilitasaun Integradu ida hodi akumulá ema vulnerável sira, liliu ba ema ho psiko-sosiál no tipu defisiénsia seluk no sira ne'ebé ho moras króniku. Ministra apresia ho planu ida ne'e no sei kontinua halo diskusaun ho Diretor Klibur Domin Joaquim Freitas Soares kona-ba prosesu sira tuir mai.



Inisiativa husi Primeiru-Ministru hodi selebra natal hamutuk ho Ema ho Defisiénsia (EhD) sira.

Ema ho Defisiénsia konsidera Primeiru-Ministru Kay Rala Xanana Gusmão nu'udar Protetór no Defensór ba Ema ho Defisiénsia tanba ne'e sira hanaran nia "Liurai ba Ema ho Defisiénsia". Iha Centro Convenções de Dili, iha loron 25 Dezembru 2023, Primeiru-Ministru selebra no haksolok hamutuk ho comunidade defisiénsia sira, hodi fahe mós presente natal ba grupu orfanatus, organizaun Ema ho Defisiénsia no mós ba labarik sira. Ministra Verónica das Dores no Vise-Ministra Céu Brites mós partisipa iha selebrasaun natal hamutuk ne'e. Serimónia ne'e finansia husi Ministériu Turizmu, Komersiu no Indústria ne'ebé lidera husi Vise-Primeiru-Ministru, Ministru Koordinadór Asuntus Ekonómikus no Ministru Turizmu no Ambiente Francisco Kalbuadi Lay.



Apoi u manitaria ba Ema ho Defisiénsia (EhD) iha Suku Camanasa, Postu Suai Vila, Munisípiu Covalima.

Ministra Verónica das Dores apoiu assistensia umanitária ba comunidade sira iha Suku Camanasa inklui ba Ema ho Defisiénsia sira. Apoiu ida ne'e akompaña mós husi Xefe Suku Camanasa, no mós Komandante Polisia no autoridade lokál sira seluk husi Suku Matai ne'ebé besik ba suku Camanasa. Ba comunidade sira, Ministra hatete apoiu nesesidade báziku hirak ne'e fó ho espíritu, fuan no domin. Tan ne'e, la bele haree ba sasan nia valór.

Ida ne'e mak governu nia kbiit atu apoiu no governu sei la haluha nia comunidade sira, liliu sira ne'ebé mak moris vulneravel.



Vise-Ministra Céu Brites celebra natal ho prizioneirus no quadrus prizioneiru iha Prizaun Fatukeru, 27 Dezembru 2023.

Vise-Ministra husu prizioneiru sira atu halo reflesau hodi muda karakter bainhira kumpri ona dever no reintegra fali ba comunidade. Importante tebes atu moris hanesan sidadaun ne'ebé iha mudansa bainhira reintegra fali ba família, viziñu no iha sosiedade.

Vise-Ministra mós enkoraza prizioneiru sira, no hakarak rona istoria no esperiensa ne'ebé sira hasoru, sira nia mehi, no sira nia planu ba futuru. Vise-Ministra motiva sira atu uza tempu iha prizaun nu'udar tempu importante hodi refléta ho profunda jornada no objetivu moris nian. Iha prizaun Fatukeru, total prizioneiru hamutuk 101; feto 16 no mane 96, no Guarda Prizaun na'in 30; feto 9 no mane 21. Programa rehabilitasaun iha Prizaun ne'e inklui formasaun iha área karpintaria, kustura, literasia numerasia ekivalénsia, lingua portugés no inglés. Iha mós fomasaun ba área hortikultura liliu ba prizioneiru sira ne'ebé kumpri ona tempu metade de pena.



Ministra Verónica das Dores celebra natal hamutuk ho prizioneiru no guarda prizaun sira iha Prizaun Covalima.

Iha loron 27 Dezembru 2023, Ministra Verónica das Dores celebra natal hamutuk prizioneirus no guarda prizaun sira iha Prizaun Suai, Covalima. Ministra korajen prizioneiru sira atu uza tempu didi'ak iha prizaun hodi halo reflesaun ba hahalok hotu ne'ebé sira halo ona hodi lori sira mai fatin ida ne'e. Ministra apela bainhira pena remata, reintegra fali ba família, tenki halo esforsu atu la bele fila mai tan prizaun. Ministra hatutan, tuir lolos prizaun iha tempu independénsia la bele iha ona. Haka'as-an ba, atu moris iha familia no komidade ho komportamentu ne'ebé di'ak liu. Iha vizita ne'e Ministra mós entrega assistensia baziku ba prizaun. Prizaun Covalima iha guarda prizonal 37; mane 33 no feto 4. Total prizioneirus hamutuk 113 kompostu husi kondenada 94, preventiva 19 ne'ebé mai husi munisipiu Ainaro, Bobonaro, Manufahi no Covalima.



Ministra Verónica das Dores ho Vise-Ministra Céu Brites celebra natal hamutuk ho labarik sira iha Batugade.

Natal hamutuk ne'e organiza husi Institutu Nasionál Defesa Direitu ba Labarik (INDDICA) iha loron 28 Dezembru 2023. Selebrasaun ne'e hahú ho misa agradesimentu ne'ebé prezide husi Padre Parokia Santo António Balibo. Ministra hatete igreja nu'udar representante Maromak no Governu nu'udar representante Estadu, iha dever atu servisu hamutuk ba povu no nasaun hodi tau matan ba labarik sira. Minstra hatete ninia sentimentu triste tristi bainhira haré labarik sira halo problema iha estrada, tuda malu, baku malu liuliu oho malu. Ministra hatutan, ita hakarak povu nasaun ida-ne'e, moris iha domin, paz no armónia. Moris hamtauk Maromak tanba sé moris tauk Maromak mak violénsia sei laiha. Iha natal hamutuk ne'e, MSSI liuhosi INDDICA distribui mós prezente natal nian ba labarik sira, hanesan pasta ne'ebé kompleta ho materia eskola ninian. Labarik ho sira-nia inan-aman kontente tebes tanba bele celebra natal hamutuk ho governante sira.



Ministra Verónica das Dores ho Vise-Ministra Céu Brites celebra natal ho prizioneirus iha Prizaun Becora, Dili.

Ministra fó hanoin katak prizaun fatin atu halo reflesaun ba hahalok aat sira, muda mentalidade no atitude sira ne'e hodi bele hakat ba futuro ne'ebé di'ak liu. Ministra fó hanoin hikas, iha tempu okupasaun, Timoroan hotu tama kadeia tanba defende nasaun nia soberania, maibé agora iha tempu ukun-an ida-ne'e, Timoroan sira la merese tan ona atu tama kadeia. Ministra husu atu transforma prizaun sai uma dame no di'ak liu labele iha tan prizaun. Iha okaziaun natal hamutuk ne'e Ministra no delegasaun lori mós presente balun nu'udar domin husi Ministra no Vise-Ministra ba prizioneiru sira. Totál prizioneiru iha Prizaun Becora hamutuk 406; prizaun preventiva iha 64 no kondenadu iha 342. Vizita ba prizaun Becora remata ona vizita ba prizaun sira hotu iha Timor.



Ministra no Vice-Ministra partisipa iha Marsa da Pátria hodi komemora Loron Nasionál dos Erois.

Iha loron 31 Dezembru 2023, Ministra Verónica das Dores ho Vice-Ministra Céu Brites, partisipa iha Marsa da Pátria ho rute husi Palácio Presidêncial to iha Rotunda Saudozu Prezidente Nicolau Lobato, hodi komemora Loron Nasionál Erois.

Selebrasaun tinan ida ne'e ho tema nasional "Memoria Herois Sira mak Lalenok no Naroman ba Jersaun Kontinuador, hodi Hametin Espiritu Nasionalizmu no Patriotizmu ba Foinsa'e Sira". Marka prezensa iha selebrasaun ne'e mós, lider topu husi orgaun soberania ha'at, membru governu konstitusional da-9, Komandu FALINTIL Forsa Defeza Timor-Leste, Komandu Polísia Nasionál Timor-Leste, veteranus, korpu diplomátiku, populasau, mídia no seluk tan.



Iha 31 Dezembru kalan fahe rua, Ministra partisipa iha taka sistema Konta Jeral Estadu 2023, no Vise-Ministra partisipa iha vespra simu tinan foun 2024.

Iha kalan fahe-rua, iha loron 31 Dezembru, Primeiru Ministru Kay Rala Xanana Gusmão oficialmente taka Konta Jeral Estadu 2023, iha Ministeriu Finansas Aitarak-Laran, Dili. Taka konta ne'e asiste direta husi Ministra

Verónica das Dores no Vise-Ministra Finansas Felicia Claudinanda Cruz Carvalho ho tekniku sira ne'ebé opera sistema Konta Jeral Estadu ne'e. Enkuantu iha momentu hanesan, Vise-Ministra Céu Brites hamutuk ho membru Governu Konstitusional da-9 partisipa iha vespera husik tinan tuan 2023 no simu tinan foun 2024 iha Palasiu Presidencial, Aitarak-Laran, Dili. Programa ne'e lidera husi Presidente da República Jose Ramos Horta, no fahe mós premiu ba manan-na'in halo prezepiu sira. Aleinde governante sira, membru Parlamentu Nasionál sira, Prezidente Tribunal Rekursu mós partisipa, iha mós comunidade no media sira.



Konkluziun

Relatoriu ne'e sai nu'udar dokumentus interna Governu Konstitusionál da-9 nian, atu hodi justifika responsabilidade Ministério Solidariedade Sosiál no Inkuzasaun nian, ba ezekusaun Orsamento do Estado 2023, liliu orsamentu retifikativu iha semester daruak tinan 2023 nian. Relatóriu ne'e kompila ho forma istória liuhosi fotografia. Ba informasaun detaiLLU bele asesu hosi pájina mídia sosiál MSSl : <https://www.facebook.com/mssi9Governu>

–00–



Produtu MSSI, 2024

Eskritór:

- Ana Teresa Sequeira
- Samuel Soares

Revista husi: Assessora Prinsipál, Dulce da Cunha

Aprova husi: Ministra da Solidariedade Sociál e Inlução, Excia
Verónica das Dores